

Wárágà Yòwánì dré tisìle dhi ni àlo

Wárágà kònìdhi ni tà àndu ngìle drìdrì dhi

A adré kisùá dhi, dhya wárágà kònìdhi ni tisìlepi dhi tá Yòwánì, àpóstolò kì àlo 'i, ìndì Èkèlézyà ni drì kobhá kàdrì dhi kì àlo 'i. Tágba à dré adrézó Yòwánì nda ni rú kisú wárágà kònìdhi léna ko dhi, à ni kitswá nòá ngádra 'á dhi, dhya wárágà kònìdhi ni tisìlepi dhi tá dhya Yésu ni tà nobhá mǐ sè dhi kì àlo 'i (1:1-4).

Yòwánì adré wárágà kònìdhi ni tisì tà kàdrìkàdrì rǐ dhi i sè. Alo ni, adré móndyá ka'ìbhá dhi kì kodzó tàzoá dhi, ngóro ì dré ru amulé Gìká Atá be, ìndì akódhi ni Mvá, Yésu Krísto be dre dhi tíni dhi, lè ì kàdré adrélé àyi léna. Ì kàdré kpà tròle tà ì dré yìle àpóstolò i tí dhi i rú. Adré kpà tàá dhi, dhya ángùdhi Gìká ni nìlepi bàti dhi ni kpà akódhi ni tòlí kì ka'ì 'òle. Kòdhi adré tàá dhi, ì ni Gìká ni Mvágó, Yésu Krísto ni ka'ì, adrézó kpà ru le àyi kòfalésè. Tàko ko, Gìká ni tàndi lèle 'i (3:11-24; 4:7-21).

Rǐ ni, Yòwánì adré àyi kì kodzó, ì kàdréro àyi kì líkì tà pròfétà kinzò ro dhi ì dré adrélé tadhále dhi kì tà sè. Adré tàá dhi, ì kàdré móndyá títi dhi kì tabhì, nǐzoá ngalè tírì àyi léna dhi i Tírì Gìká àdhya 'i bàti yà dhi (4:1-6). Adré kpà àyi kì kodzó tàzoá dhi, ì lavú bvò kònìdhi dre, ìndì Tírì adrélépi àyi lé dhi kàdrì, tírì adrélépi bvò kònìdhi lé dhi ni lavú (4:4).

Tà kàdrìkàdrì wárágà kònìdhi léna dhi ki atìma

- 1) Kúlí adrélépi lídrì fe dhi (1:1-4)
- 2) Ngádra i tínímvá be dhi (1:5-2:29)
- 3) Giká ni ànzi i Dzáborò kya íbe dhi i (3:1-24)
- 4) Tà bàti i kinzò be dhi (4:1-6)
- 5) Giká ni lèle, ìndì ru lèma àma kòfalèsè dhi (4:7-21)
- 6) Giká ni Mvágó ni ka'ima (5:1-21)

Kúlí adrélépi lídrì fe dhi

¹ Mà adré dhya adrélépi tá be kínó tà títi dhi ki kidhoma lésè, mà dré yìle, mà dré nòle mǐ sè, mà dré tabèle, ìndì mà dré tà ni ni kisùzo dhi ni tà longó kòdhya. Akódhi nda Kúlí adrélépi lídrì fe dhi 'i. ² Lídrì nda apfò tá àma kòfalé gò, mà dré nòzoá. Di mà adré tà mà dré nòle mǐ sè nda ni tà ta, adrézó lídrì kóná vèsè kólyá adrélépi tá Giká Atá véna gò, dré apfòzo àma kòfalé nda ni tà longó kòdhya. ³ Mà adré tà mà dré nòle ìndì mà dré yìle nda ni longó àmi dré, mǐ kàmúró kpà ru àma íbe adrélé tùmǎní be dhi bvó. Ama, mà amú ru Giká Atá be, ìndì akódhi ni Mvágó, Yésu Krísto be dre. ⁴ Mà adré tà kòdhi ki tisì, mà kàdréró lenzélé tùmǎní àmi íbe kitswálé títi.

Atsima ngádra 'ásè dhi

⁵ Tà mà dré yìle Yésu Krísto nda tí gò, mà dré adrézó longóá àmi dré dhi, tà kònìdhi 'i: Giká ngádra 'i, ìndì akódhi léna dhi, tínímvá àlomvá yókódhó. ⁶ Mà kàdré tàá dhi, mà amú ru Giká be dre gò, mà dré adrézó atsílé tínímvá na dhi, kòdhi mà adré kinzò ta, ìndì mà adré atsílé tà bàti

na ko. ⁷ Di, mà kàdré àmakya atsilé ngádra 'ásè ngóró Gíká nì tàndi dré adrélé ngádra 'á dhi tìni dhi, mà amú ru àma kòfalésè gò, akódhi nì Mvá, Yésu nì kàrí dré adrézó àma kì temvé tàkonzì wáyì dhi ì lésè.

⁸ Mà kàdré tàá dhi, àma tàkonzì àko dhi, kòdhi mà adré àma kì tàndi kì lití, ìndì tà bàti àma léna yókódhó. ⁹ Di, mà kàdré àma kì tàkonzì kì ta ngádra 'á Gíká kandrà dhi, akódhi nì àma kì tàkonzì nda kì tri gò, àma kì temvézó àma kì tà kònzì wáyì dhi ì lésè. Tàko ko, akódhi gyăgya, ìndì kitswá adrélé ka'ile togó wáyì sè. ¹⁰ Mà kàdré tàá dhi, mà 'o tàkonzì ko dhi, mà adré Gíká nì bha kinzò líyí ro, adrézó kpà tadhá dhi, akódhi nì kúlí àma léna yókódhó.

2

Krìsto, dhya adrélépi àma kì tàrà ga dhi 'i

¹ Ama ànzì ì, má adré tà kòdhi kì tisì àmi dré, mà kò'oró tàkonzì ko dhi bvó. Di, dhya àlo kò'o tàkonzì dhi, àma dhya adrélépi àma kì tàrà ga Gíká Atá kandrà dhi íbe. Akódhi nda Yésu Krìsto, dhya adrélépi gyăgya dhi 'i. ² Gíká afè akódhi dràle mòbòmà ro, àma kì tàkonzì kì trizo ásà. Ngbà 'í tàkonzì àmakya 'i ko, afè akódhi dràle móndyá títi bvó àdhya kì tàkonzì kì trizo.

³ Mà kàdré Gíká nì tòlí kì ka'ì 'òle dhi, mà nì tàle dhi, mà nì akódhi bàti dhi be. ⁴ Dhya adrélépi tàá dhi «Má nì akódhi be» gò, dré adrézó akódhi nì tòlí kì ka'ì 'òle ko dhi, dhya nda kinzò líyí 'i, ìndì tà bàti akódhi léna yókódhó. ⁵ Di, dhya adrélépi ína akódhi nì kúlí ka'ì 'òle dhi adré

tadhá dhi, Giká ni lèle ga akódhi léna kitswálé títi. Tà kòdhi sè dhi, mà nǐ tàle dhi, àma akódhi léna dhi be. ⁶ Lè dhya ángùdhi adrélépi tàá dhi, í adré adrélé akódhi léna dhi, kàdré atsilé ngóro Yésu ni tàndi dré atsilé dhi tǐni.

Tòlí tídhí ro dhi

⁷ Ama arúpi má dré lèle tò ni i, má adré tòlí tídhí ro dhi ni tisì àmi dré kòdhya ko. Be ró dhi, tòlí má dré adrélé tisìle kòdhi, tòlí àku mì dré kisùlé adrézó ába kǐdhólé kǐdhoma lésè dhi 'i. Tòlí àku nda kúlí mì dré yǐle dre dhi 'i. ⁸ Tágba kònìni dhi, má adré kpà tòlí tídhí ro dhi ni tisì àmi dré kòdhya. A ni kitswá tà bàti tòlí nda àdhyà ni no Krísto na, ìndì àmi léna. Tàko ko, tǐnǐmvá adré akǐlé, ìndì ngádra bàti dhi kǐdhó adrélé nga kazá dre.

⁹ Dhya adrélépi tàá dhi, i ngádra 'á gò, dré adrézó togó kònzì bha áyi adrúpi rú dhi, dhya nda dhu rè tǐnǐmvá na. ¹⁰ Dhya adrélépi áyi adrúpi ni le dhi adré atsilé ngádra 'ásè, ìndì tà àlo kitswálépi akódhi ni 'o dhèle dhi akódhi léna yókódhó. ¹¹ Di, dhya adrélépi ína togó kònzì bha áyi adrúpi rú dhi, dhu rè tǐnǐmvá na, ìndì adré atsilé tǐnǐmvá na. Akódhi nda nǐ ngalè í adré lèle ángolé ya dhi ko. Tàko ko, tǐnǐmvá nda 'o akódhi ni mì adùle dre.

¹² Àmi, àma ànzì i, má adré tà tisì àmi dré, Giká dré àmi kǐ tàkonzì trǐle Krísto ni rú sè dhi sè.

¹³ Àmi, ànzì kǐ atá i, má adré tà tisì àmi dré, mì dré dhya adrélépi be tà títi dhi kǐ kǐdhoma lésè dhi ni nǐle be dhi sè.

Àmi, tódhíbhá i, má adré tà tisì àmi dré,

mì dré Dhya kònzì ni lavulé dre dhi sè.

¹⁴ Amì, áma ànzì i, má tìsì tà àmì dré,
mì dré Gìká Atá ni nìle be dhi sè.

Amì, ànzì kì atá i, má tìsì tà àmì dré,
mì dré dhya adrélépi be tà títi dhi kì kidhoma
lésè dhi ni nìle be dhi sè.

Amì tódhíbhá i, má tìsì tà àmì dré,
mì dré adrélé rinyi ró dhi sè,

Gìká ni kúlí dré adrélé àmì léna dhi sè,

ìndì mì dré Dhya kònzì ni lavulé dre dhi sè.

Bvò kònìdhi ni tà lèma ko dhi

¹⁵ Lè mì kàdré bvò kònìdhi 'i yà, kó ngalè tà bvò kòndì àdhya 'i yà dhi kì le ko. Dhya àlo kàdré tà bvò kòndì àdhya kì le dhi, Gìká Atá ni lèle akódhi léna yókódhó. ¹⁶ Tàko ko, tà bvò kòndì àdhya i, tà kòni 'i: lovó kònzì rúbhá àdhya i, lovó kònzì ngá adrélé nòle mì sè dhi i sè dhi i, ìndì dhyá kì afàma ngá adrézó ába dhi kì tà sè dhi. Tà nda kòdhi ì adrè angalé Gìká Atá vélésè ko. Be ró dhi, ì adrè àyikya angalé bvò kònìdhi lésè. ¹⁷ Bvò kònìdhi ì lovó kònzì bvò kòndì àdhya ìbe dhi ì adrè akílé akíakí. Dì, dhya adrélépi tà Gìká dré adrélé lèle í kò'o dhi kì 'o dhi, ni ína adrè lídrì ìbe kóná vésè kólyá.

Krìsto ni kàribhá ni atsama

¹⁸ Áma ànzì i, lókyá ándrò kònìdhi lókyá kùdù 'i. Mì yi tàle dhi, Krìsto ni kàribhá ni dra atsá dhi 'í. Dì ndàndì nyànomvá dhi, Krìsto ni kàribhá bí dhi ì apfò dre. Tà nda sè dhi, mà nì tàle dhi, kònìdhi lókyá kùdù 'i dhi be. ¹⁹ Mòndyá nda ì pfò àma kì tàndì ì kòfalésè. Dì, àyi tá àyikya mòndyá àmakya 'i ko. Tàko ko, ì kàdré

tá mǒndyá àmakya 'i dhi, kònò ì ni tá adré ngbú tǔmání àma íbe. Dì, àyì kì pfòma nda adré ìna tadhá dhi, àyì kì àlo tá àmakya 'i ko.

²⁰ Dì, àmì ró dhi, àmì àmikya Tírí Lólo Krísto dré kutulé àmì dri dhi íbe gò, àmì títí mì dré tà bàti nǐzo. ²¹ Má adré tà tìsì àmì dré, mì dré tà bàti nǐle ko dhi sè ko. Be ró dhi, má adré tà tìsì àmì dré, mì dré tà bàti nǐle be dhi sè, ìndì tà àlo kǐnzò ro dhi dré adrélé angálé tà bàti nda lésè ko dhi sè.

²² Dì kǐnzò líyí ìna àdhi 'i? Akódhi dhya adrélépì tàá dhi, Yésu Mèsíyà 'i ko dhi 'i. Dhya nda Krísto nì kàribhá 'i. Adré Gìká Atá nì ga, akódhi nì Mv́a be. ²³ Tàko ko, dhya ángùdhi adrélépì Gìká nì Mv́a nì ga dhi, akódhi Gìká Atá íbe í léna ko. Dhya ángùdhi adrélépì Gìká nì Mv́a nì ka'í dhi, akódhi kókpa Gìká Atá íbe í léna.

²⁴ Àmì ró dhi, lè mì kàdré tà mì dré tá yìle kǐdhólé kǐdhoma lésè dhi kì líkí adrélé àmì léna. Tàko ko, tà mì dré yìle nda ì kàdré àmì léna dhi, àmì kì tàndì mì nì kpà adré Gìká nì Mv́a na, ìndì Gìká Atá na. ²⁵ Tà Krísto dré lazilé àma dré dhi, tà kònòdhi 'i: lídrì kóná vésè kólyá dhi.

²⁶ Má adré tà kòdhi kì tìsì àmì dré mǒndí adrèbhá látì nda kǐswázó àmì kì lití dhi kì tà sè. ²⁷ Dì, àmì ró dhi, mì kǐsú Krísto nì Tírí dré kutulé àmì dri dhi gò, Tírí nda dré adrézó àmì léna. Asà dhi, lè dhya àlo kògò adrélé tà tadhá àmì dré ko. Tàko ko, Krísto nì Tírí nda adré tà títí dhi kì tadhá àmì dré nì. Tà dré adrélé tadhále nda ì tà bàti 'i, kǐnzò 'i ko. Dì ngóro Tírí nda dré tadhále àmì dré dre dhi tǐnì dhi, mì kàdré adrélé Krísto na.

Gìká nì ànzì ì

²⁸ Dì nyànomvá dhi, áma ànzì ì, lè mì kàdré adrélé Krísto na, akódhi kònì dra apfò dhi, mà kògaró tà mà dré ka'ile bàti dhi sè bǐ, adrélé kanyò àko akódhi kandrà kítú dré dra agòzo dhi tú. ²⁹ Mì nǐ tàle dhi, akódhi gyăgya dhi be. Ásà dhi, mì nǐ kpà tàle dhi, dhya ángùdhi adrélépi tà gyăgya 'o dhi, móndí akódhi dré tile dhi 'i dhi be.

3

¹ Mì kisù rè lèle kàdrì Gìká Atá dré tadhálé àma véle, à kàdréro àma kǐ zǐ akódhi nì ànzì ì ró dhi ká! Dì àma akódhi nì ànzì 'i bàti. Mónďyá bvò kòndi àdhya ì nǐ àma àdhibhá 'i ya dhi ko, ì dré kpà Gìká Atá nì nǐle ko dhi sè. ² Áma arúpi má dré lèle tò nì ì, nyànomvá dhi, àma Gìká nì ànzì 'i. A tadhá dhu rè mà nì adré ngíni ya dhi ko. Dì, mà nǐ àmakya tà kònìdhi kòdhya: Krísto kònì dra apfò dhi, mà nì adré akódhi tǐni. Tàko ko, mà nì akódhi nì no ngóro dré adrélé dhi tǐni. ³ Dhya ángùdhi adrélépi mǐ bha Gìká véna tà nda kòdhi sè dhi, adré áyi tàndi nì temvé, ngóro Krísto nì tàndi dré adrélé lólo dhi tǐni.

⁴ Dhya ángùdhi adrélépi tàkonzì 'o dhi adré Gìká nì tátírí kúlí ño. Tàko ko, tàkonzì 'òma ína ligima Gìká nì tátírí kúlí rú dhi 'i. ⁵ Dì, mì nǐ tàle dhi, Krísto apfò kitswálé àma kǐ tàkonzì tingá dhi be. Mì nǐ kpà tàle dhi, tàkonzì akódhi léna yókódhó dhi be. ⁶ Dhya ángùdhi adrélépi adrélé akódhi léna dhi kitswá gòle adrélé tàkonzì 'o ko. Dhya ángùdhi adrélépi tàkonzì 'o dhi nò akódhi rè ko, ìndì nǐ kpà akódhi ko.

⁷ Ama ànzì ì, m̀ k̀tàyí àmì dhya àlo dré litílé ko. Dhya ángùdhi adrélépi tà gyăgya 'o dhi gyăgya, ngóro Krísto nì t̀ndì dré adrélé gyăgya dhi t̀nì. ⁸ Dì, dhya adrélépi tàkonzì 'o dhi ína m̀ndí Dzáborò àdhya 'i. Ángyá ko, Dzáborò nda adré tàkonzì 'o kidhólé kidhoma lésè. Tà nda sè dhi, Gìká nì Mvágó apfò kitswálé tà Dzáborò dré adrélé 'òle dhi k̀ pfu akílé dhi bvó. ⁹ Dhya ángùdhi Gìká dré t̀lè atsálé áyi mvá ro dhi kitswá gòle adrélé tàkonzì 'o ko, Gìká nì t̀ndì nì lídrì dré adrélé akódhi nda léna dhi sè.* Dhya nda kitswá gòle adrélé tàkonzì 'o bwà ko, Gìká dré akódhi nì t̀lè nì dhi sè. ¹⁰ Mà nì kitswá Gìká nì ànzì k̀ nì lanzílé Dzáborò nì ànzì íbe, tà k̀ndì sè: Dhya ángùdhi adrélépi tà gyăgya 'o ko dhi, Gìká nì mvá 'i ko. Dhya adrélépi áyi adrúpi nì le ko dhi k̀kpà Gìká nì mvá 'i ko.

Ru lèma àma k̀falésè dhi

¹¹ Tà m̀ dré ỳlè kidhólé kidhoma lésè dhi, tà k̀ndì 'i: Lè mà k̀dré ru le àma k̀falésè. ¹² Lè mà k̀dré tà 'o Kàyínà àdhya t̀nì ko. Akódhi nda tá m̀ndí Dhya k̀nzì àdhya 'i gò, dré áyi adrúpi nì pfùzo dràle. Dì, pfu tá áyi adrúpi nda dràle àdho tà sè? Pfu akódhi dràle, áyi tà 'òle dhi ì dré tá adrélé k̀nzì dhi sè, ìndì áyi adrúpi nì tà 'òle dhi ì dré tá adrélé gyăgya dhi sè.

¹³ Ama adrúpi ì, m̀ndyá bvò k̀ndì àdhya ì k̀dré togó k̀nzì bha àmì rú dhi, lè àmì k̀ líndrì k̀dré gàle ásà ko. ¹⁴ Mà nì tàle dhi, mà

* **3:9** 3:9 Gìká nì Kúlí t̀sìle G̀rìkì tì sè dhi adré tàà k̀nwa dhi: «Gìká nì k̀rì dré adrélé akódhi nda léna dhi sè.»

apfò dràdrà lésè afilé lídrì le dre dhi be, mà dré adrélé àma ki adrúpi ki le dhi sè. Dhya adrélépi móndí ki le ko dhi dhu rè rinyí dràdrà àdhya zàle. ¹⁵ Dhya ángùdhi adrélépi togó kònzì bha áyi adrúpi rú dhi, móndí pfùlepi dràle dhi 'i. Di mà nǐ tàle dhi, móndyá adrébhá móndí pfu dràle dhi ki àlo lídrì kóná vésè kólyá dhi íbe í léna ko dhi be.

¹⁶ Mà nǐ kitswá nǐá ngalè lèle àdho 'i ya dhi, tà kònìdhi sè: Yésu Krísto fè tá áyi tàndì nǐ lídrì àma ki tà sè. Adré di lèá dhi, mà kàdré kókpa àma ki lídrì fe àma ki adrúpi ki tà sè. ¹⁷ Dhya àlo adrélépi ngá íbe dhi kàdré áyi adrúpi nǐ no adrérà'a lemerè ro gò, dré adrézó kizà nǐ nǐ bha ko dhi, Gĩká nǐ lèle nǐ kitswá adrélé akódhi nda léna ngínìngínì ró? ¹⁸ Ama ànzì i, lè mà kàdré móndí ki le ngbà 'í kúlí i sè ko, ìndì ti sè ko. Be ró dhi, mà kàdré àmakya móndí ki le tà mà dré adrélé 'òle dhi i sè ìndì tà bàti sè. ¹⁹ Mà kàdré 'òá kònìni dhi, mà nǐ nǐá dhi, àma móndí tà bàti àdhya 'i dhi be. Mà nǐ kitswá kpà àma ki togó bha adrélé kìdrìkìdrì Gĩká kandrà. ²⁰ Di, àma ki togó kàdré àma ki arókì, adrézó tà bha àma dri dhi, mà nǐ tàle dhi, Gĩká kàdrì àma ki togó lavú, ìndì akódhi nǐ tà títi dhi be.

²¹ Ama arúpi má dré lèle tò nǐ i, àma ki togó kàdré tà bha àma dri ko dhi, mà nǐ adré gàle tà mà dré ka'ìle bàti dhi sè bí Gĩká kandrà. ²² Mà adré kpà tà ángùdhi mà dré adrélé zìle akódhi tí dhi nǐ kisú, mà dré adrélé akódhi nǐ tòlí ki ka'ì 'òle dhi sè, ìndì mà dré adrélé tà akódhi nǐ togó dré adrézó kinílé ásà dhi ki 'o dhi sè. ²³ Di tòlí Gĩká dré afèle àma dré dhi, kònìdhi 'i: Mà

kòka'í akódhi ni Mváagó Yésu Krísto, adrézó kpà ru le àma kòfalésè, ngóro dré tá tàle mà kò'o dhi tíni. ²⁴ Dhya ángùdhi adrélépi Gíká ni tòlí ki ka'í 'òle dhi adré adrélé akódhi léna. Gíká adré kpà adrélé dhya nda léna. Mà ni kitswá nǎá dhi, Gíká adré adrélé àma léna dhi, tà kònìdhi sè: Mà ni nǎá Tírí Lólo Gíká dré afèle àma dré dhi sè.

4

Tírí móndí í lé dhi kí tabhìma

¹ Àma arúpi má dré lèle tò ni í, lè mì kàdré móndyá títi adrèbhá tàá dhi, àyi Gíká ni Tírí íbe àyi léna dhi kí ka'í ko. Be ró dhi, mì kàdré àyi nda kí tabhì, nǐzoá ngalè tírí àyi lé dhi ì angá Gíká vélésè bàti yà dhi. Tàko ko, pròfétà kinzò ro bí dhi ì apfò ayílé bvò wǎyi 'ásè dre. ² Mì ni di kitswá nǎá ngalè tírí àyi lé nda í Tírí Gíká àdhya 'í yà dhi, tà kònìdhi sè: Dhya ángùdhi adrélépi ka'íá tàle dhi, Yésu Krísto atsá bvò kònìdhi 'á móndí ro káyà dhi, dhya nda Tírí Gíká àdhya íbe í léna. ³ Di, dhya ángùdhi adrélépi Yésu ni tà ga rè dhi, dhya nda Tírí Gíká àdhya àko í léna. Tírí akódhi nda léna dhi, tírí Krísto ni kàribhá àdhya 'í. Mì yi tàle dhi, Krísto ni kàribhá nda adré alìle. Di akódhi nda atsá adrélé bvò kònìdhi lé dre.

⁴ Di, àma ànzi í, àmi àmikya móndí Gíká àdhya 'í. Mì lavú kpà pròfétà kinzò ro nda í dre. Tàko ko, Tírí adrélépi àmi lé dhi kàdrì, tírí adrélépi bvò kònìdhi lé dhi ni lavú. ⁵ Ayi nda í móndyá bvò kòndi àdhya 'í. Asà dhi, ì adré tà ta ngóro móndyá bvò kòndi àdhya kya tíni gò, móndyá bvò àdhya ì dré adrézó àyi kí kúlí yi. ⁶ Di, àma

àmakya móndí Giká àdhya 'i. Dhya ángùdhi Giká ni ñilepi be dhi adré àma ki kúlí yi. Di, dhya ángùdhi adrélépi Giká àdhya ró ko dhi adré ína àma ki kúlí yi ko. Tà nda kòdhi sè dhi, mà ni kitswá Tirí tà bàti àdhya ni ni lanzilé tirí kinzò àdhya be.

Giká lèle 'i

⁷ Àma arúpi má dré lèle tò ni i, mà kàdré ru le àma kòfalésè. Tàko ko, lèle adré angalé Giká vélésè. Dhya ángùdhi adrélépi móndí ki le dhi, akódhi nda Giká ni mvá 'i. Akódhi ñi kpà Giká be.

⁸ Dhya ángùdhi adrélépi móndí ki le kò dhi ñi ína Giká ko. Tàko ko, Giká lèle 'i. ⁹ Giká tadhá áyi lèle àma véle dhi tà kònìdhi sè: Amù áyi Mvágó àlo kwákwá dhi alìle bvò kònìdhi lé, mà kòkitswáró lídrì kisú akódhi sè be dhi bvò. ¹⁰ A adré lèle nda ni no tà kònìdhi sè: Mà lè tá Giká àma ko. Be ró dhi, akódhi lè ína àma ñi gò, áyi Mvágó ni amùzo kitswálé dràle mòbòmà ro, àma ki tàkonzì ki trizo ásà.

¹¹ Àma arúpi má dré lèle tò ni i, Giká kòlè àma tò kònìni dhi, lè mà kàdré kókpà ru le àma kòfalésè. ¹² Dhya àlo nò rè tàdzí Giká ko. Di, mà kàdré ru le àma kòfalésè dhi, kòdhi adré tadhá dhi, Giká adré adrélé àma léna, ìndì akódhi 'o áyi lèle gale àma léna kitswálé títi.

¹³ Mà ni kitswá ñiá dhi, mà adré adrélé Giká léna, ìndì akódhi adré adrélé àma léna dhi, tà kònìdhi sè: Dré áyi Tirí afèle àma dré dhi sè.

¹⁴ Mà nò tà kòdhi mì sè gò, mà dré adrézó longóá dhi, Giká Atá amù áyi Mvágó adrélé mónnyá bvò àdhya ki tidrìlépi ró. ¹⁵ Dhya àlo kàdré ka'íá

tàle dhi, Yésu Gìká nì Mvágó 'i káyà dhi, Gìká adré adréle dhya nda léna, ìndì akódhi nda adré adréle Gìká léna. ¹⁶ Dì àma, mà nì lèle Gìká dré tadhálé àma véle dhi be gò, mà dré adrézó ka'íá.

Gìká lèle 'i. Dhya ángùdhi adrélépi atsilé lèle na dhi, adré adréle Gìká léna, ìndì Gìká adré adréle akódhi nda léna. ¹⁷ Tà nda sè dhi, lèle nda adré tà 'o àma kòfalé kitswálé títi, mà kògaró tà mà dré ka'ile bàti dhi sè bǐ Gìká kandrá, kitú dré dra tàbvó tàzo dhi tú. Tàko ko, àma kǐ lídrǐ bvò kònìdhi lé dhi ngóro Krísto àdhya tíni. ¹⁸ Lèle na dhi, tirǐ yókódhó. Be ró dhi, lèle kitswálépi títi dhi adré ína tirǐ dro. Dhya ángùdhi adrélépi ngá ro dhi, lèle ga rè akódhi nda léna kitswálé títi ko. Tàko ko, akódhi adré ngá ro, à nì dra tà ɲo í dri dhi sè.

¹⁹ Ama ró dhi, mà adré móndí kǐ le, Gìká dré zyà àma kǐ lèle drǐdrǐ nì dhi sè. ²⁰ Dhya àlo kàdré tàá dhi «Má adré Gìká nì le» gò, dré adrézó togó kònzi bha áyi adrúpi rú dhi, akódhi nda kinzò líyí 'i. Tàko ko, dhya adrélépi áyi adrúpi í dré adréle nòle mǐ sè dhi nì le ko dhi, kitswá ína Gìká í dré adréle nòle mǐ sè ko dhi nì le bwà ko. ²¹ Dì tòlí Gìká dré afèle àma dré dhi, kònìdhi 'i: Lè dhya adrélépi Gìká nì le dhi kàdré kókpà áyi adrúpi nì le.

5

Gìká nì Mvágó nì ka'ima

¹ Dhya ángùdhi adrélépi ka'íá dhi Yésu Mèsíyà 'i káyà dhi, akódhi nda Gìká nì mvá 'i. Dhya ángùdhi adrélépi ànzi kǐ atá nì le dhi, adré kókpà akódhi nì ànzi kǐ le. ² Mà nì kitswá nǎ dhi, mà

adré Gĩká ni ànzi ki le dhi, tà kònìdhi sè: M̀à dré adrélé Gĩká ni le dhi sè, ìndì mà dré adrélé akódhi ni tòlì ki 'o dhi sè. ³ Tàko ko, mà kàdré Gĩká ni le bàti dhi, mà ni akódhi ni tòlì ki ka'ì 'òle. Akódhi ni tòlì nda ki 'òma kòkòròko àma dré ko. ⁴ Angyá ko, dhya adrélépi Gĩká ni mvá ro dhi lavú bvò kònìdhi dre. Tà mà dré adrézó bvò kònìdhi ni lavú ásà dhi, àma ki tà ka'ika'ì 'i. ⁵ Di àdhi ni kitswá bvò kònìdhi ni lavú dhi ni? Ngbà 'í dhya adrélépi ka'íá tàle dhi, Yésu Gĩká ni Mv́agó 'i dhi 'i.

Tà longólé Yésu Krísto ni tà dri dhi

⁶ Yésu Krísto, dhya atsálepì bvò kònìdhi 'á kitswálé bàtisimò do, ìndì kitswálé kàrí kutú dhi 'i. Akódhi atsá tá ngbà 'i bàtisimò do ko. Be ró dhi, atsá ína kitswálé bàtisimò do yì sè, ìndì kitswálé áyi kàrí kutú. Di Tirí Lólo adré tadhá àma dré dhi, tà nda tà bàti 'i dhi nì. Tàko ko, Tirí nda tà bàti 'i. ⁷ Tà adrébhá tadhá dhi, tà nda tà bàti 'i dhi na: ⁸ Tirí Lólo, yì ìndì kàrí. Di tà na nda ì adré ru kisú adrézó tà àlo ta kòdhya. ⁹ Mà adré gà tà m̀ondí ì dré adrélé longólé dhi ki ka'ì. Di, tà Gĩká dré longólé dhi ína kàdrì tà nda ki lavú. Angyá ko, Gĩká longó tà nda áyi tàndi ni Mv́agó ni tà dri. ¹⁰ Dhya ángùdhi adrélépi Gĩká ni Mv́agó ni ka'ì dhi, dhya nda tà Gĩká dré longólé nda íbe í léna. Di, dhya adrélépi Gĩká ni ka'ì ko dhi adré ína akódhi ni bha kinzò líyí ro, dré tà Gĩká dré longólé áyi Mv́agó ni tà dri dhi ni ka'ile ko dhi sè. ¹¹ Di tà longólé nda, tà kònìdhi 'i: Gĩká afè àma dré lídrì kóná vésè kólyá dhi, ìndì mà adré lídrì nda ni kisú akódhi ni Mv́agó na.

¹² Dhya ángùdhi adrélépi Gĩká ni Mvágó nda íbe dhi kókpà lídrì nda íbe í léna. Di, dhya adrélépi Gĩká ni Mvágó nda àko í léna dhi kókpà lídrì nda àko.

Yòwánì ni kùlì kùdù

¹³ Má adré tà kòdhi ki tisì àmi adrèbhá Gĩká ni Mvágó ni ka'ì dhi i dré, m̀ kòkìswáró niá dhi, àmi lídrì kóná vèsè kólyá dhi íbe dhi be. ¹⁴ Tà mà dré adrélé ka'ile bàti Gĩká kandrà dhi, tà kònìdhi 'i: Mà kàdré tà zi akódhi tí ngóro dré adrélé lèle dhi t̀ni dhi, akódhi adré àma ki yi. ¹⁵ Di mà dré nìle, akódhi adré àma ki yi dhi sè dhi, mà ǹ kpà tàle dhi, mà adré tà ángùdhi mà dré adrélé zìle akódhi tí dhi ni kisú dhi be.

¹⁶ Dhya àlo kàdré àyi adrúpi ni no adrérà'a tàkonzì 'o gò, tàkonzì nda dré adrézó dhyá ki dri l̀le dràdrà kisú ko dhi, lè dhya nda kòzi tà Gĩká tí akódhi nda dré gò, Gĩká kòfèro lídrì akódhi dré. Má adré ngbà 'í m̀ndyá àyi ki tàkonzì dré adrézó àyi ki dri l̀le dràdrà kisú ko dhi ki tà ta kòdhyà. Tàkonzì adrélépi dhyá ki dri l̀le dràdrà kisú dhi be. Má adré tàá dhi, à kàdré tà zi Gĩká tí m̀ndyá tàkonzì làsú be kònìni dhi ki 'obhá dhi i dré dhi ko. ¹⁷ Tà kònzi títi adrélé 'òle dhi i, tàkonzì 'i. Di, tàkonzì adrélépi dhyá ki dri l̀le dràdrà kisú ko dhi be.

¹⁸ Mà ǹ tàle dhi, dhya adrélépi Gĩká ni mvá ro dhi k̀swá gòle adrélé tàkonzì 'o ko dhi be. Tàko ko, Gĩká ni Mvágó adré akódhi nda ni líkì gò, Dhya kònzi dré k̀swázó akódhi ni 'o kònzi ko. ¹⁹ Mà ǹ tàle dhi, àma m̀ndí Gĩká àdhyà 'i dhi be. Mà ǹ kpà, m̀ndyá títi bvò kòndi àdhyà i Dhya

kònzì nì r̄nyí zàle dhi be. ²⁰ M̄ n̄ k̄pà t̄ale dhi, Ḡk̄á n̄ Mv̄áagó at̄sá bv̄ò kòndhi 'á gò, dré t̄ogyá af̄ezo àma dré, mà kòkit̄swáró Ḡk̄á adr̄élépi bàti dhi n̄ n̄ be dhi bv̄ó. D̄i mà adr̄é adr̄élé Ḡk̄á bàti nda léna, adr̄élé kók̄pà akódhi n̄ Mv̄á, Yésu Kr̄ísto léna. Akódhi nda Ḡk̄á bàti dhi 'i, ìndì lídr̄ì kóná v̄ésè kólyá dhi 'i.

²¹ Ama ànzì i, m̄ k̄adr̄é àm̄i k̄i lík̄í ḡk̄á t̄àko k̄i t̄à s̄è.

BÚKÙ TÀ TÍDHÍ//RU YÌZO DHÌ ADHYA
Logoti (Logo): BÚKÙ TÀ TÍDHÍ//RU YÌZO DHÌ ADHYA
New Testament

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

942af0a0-42ea-5477-8f1a-fed39823f32b